

IKS mampu wujudkan banyak peluang pekerjaan

JANJI kerajaan Pakatan Harapan untuk mewujudkan sejuta peluang pekerjaan dalam tempoh lima tahun boleh dicapai dalam jangka masa panjang jika ia dapat meningkatkan perbelanjaan pembangunan selain menggalakkan pertumbuhan industri kecil dan sederhana (IKS).

Dekan Fakulti Ekonomi dan Pengurusan Universiti Putra Malaysia, Prof. Dr. Azali Mohamed berkata, peluang pekerjaan dan kos sara hidup adalah antara isu kritikal yang kini membelenggu rakyat.

"Jika kerajaan mahu mewujudkan peluang pekerjaan, ia perlu meningkatkan lagi perbelanjaan pembangunan.

"Ini boleh membantu sektor ekonomi yang merangkumi subsektor utama iaitu pengangkutan, perdagangan dan perindustrian, tenaga dan kemudahan awam serta pertanian," katanya baru-baru ini.

Janji PH untuk mewujudkan sejuta pekerjaan dalam tempoh lima tahun terkandung dalam manifestonya bagi Pilihan Raya Umum ke-14 lalu. Awal bulan ini, Menteri Sumber Manusia, M. Kula Segaran memberitahu Dewan Rakyat bahawa dalam tempoh lapan bulan selepas PH mengambil alih pentadbiran negara, peluang pekerjaan telah meningkat sebanyak 130,000.

Sambil menyifatkan sektor ekonomi sebagai enjin yang akan mewujudkan lebih banyak pekerjaan di Malaysia, Azali berkata, pertumbuhan subsektor utama seperti perdagangan dan perindustrian serta pengangkutan boleh menyerap masuk tenaga kerja terutama dalam kalangan graduan.

Beliau menyambut baik langkah kerajaan untuk meneruskan Projek Laluan Rel Pantai Timur (ECRL) dengan jajaran baharu sepanjang 640 kilometer yang menurutnya, mampu mewujudkan 80,000 hingga 100,000 peluang pekerjaan profesional, mahir dan separuh mahir untuk rakyat Malaysia.

Pada masa sama, Azali menggesa kerajaan supaya memberi perhatian kepada IKS yang selaku tunggak utama ekonomi negara, mempunyai prospek dalam mewujudkan peluang pekerjaan.

"Kerajaan perlu menyokong dan membantu IKS secara agresif kerana ia menyediakan hampir 5.7 juta atau 70 peratus tenaga kerja di Malaysia," katanya.

Terdapat lebih 900,000 IKS di seluruh negara dengan hampir 90 peratus daripadanya terlibat dalam bidang perkhidmatan. Sektor lain merangkumi pembuatan (5.3 peratus), pembinaan (4.3 peratus), pertanian (1.1

Menjengah Minda

Disunting NURUL AFIDA KAMALUDIN (*Bernama*)

peratus) dan (perlombongan 0.1 peratus).

"Jika kerajaan dapat memberi tumpuan kepada separuh daripada jumlah IKS yang ada, itu pun dapat membantu," ujarnya.

Merujuk kepada pencapaian Korea Selatan pada 1970-an dan 1980-an, Azali memberitahu, kejayaan negara itu dalam membangunkan IKS membuka banyak peluang pekerjaan untuk rakyatnya.

"Setakat ini, negara kita belum betul-betul serius untuk mengangkat dan mengupayakan IKS.

Langkah mengupayakan IKS terutamanya dalam penghasilan produk makanan boleh membantu menangani kos hidup rakyat," jelasnya.

Sementara itu, Ketua Pegawai Eksekutif Persekutuan Majikan-Majikan Malaysia (MEF), Datuk Samsuddin Bardan berkata, kira-kira 100,000 peluang pekerjaan diwujudkan setahun sedangkan 260,000 belia menamatkan pengajian masing-masing setiap tahun.

Katanya, bidang pemasaran dan penjualan mempunyai banyak kekosongan jawatan namun kebanyakan graduan tidak berminat menyertai bi-

dang tersebut kerana ia tidak menawarkan gaji tinggi selain gaji dibayar mengikut jualan yang dibuat.

Menurutnya, tawaran pekerjaan berdasarkan kontrak jangka pendek antara tiga hingga enam bulan juga terdapat dalam pasaran tetapi tidak menarik minat mereka yang sedang mencari pekerjaan kerana bimbang tiada jaminan pekerjaan dan kerjaya.

"Mereka yang sedang mencari pekerjaan sepatutnya merebut peluang yang ditawarkan itu dalam usaha meraih pengalaman selain mendapatkan pekerjaan yang lebih baik pada masa akan datang.

"Bagi meningkatkan kemahiran tenaga kerja, pembangunan modal insan perlu digerakkan melalui transformasi pendidikan," katanya.

Justeru itu, Samsuddin menggesa kerajaan meneruskan pembaharuan pendidikan dengan memberi peneranagan kepada pembelajaran sepanjang hayat bagi melahirkan lebih ramai modal insan yang mempunyai pelbagai kemahiran.

Menurutnya, peralihan negara daripada ekonomi berdasarkan pengetauan kepada ekonomi inovatif memerlukan modal insan yang mempunyai kemahiran kognitif.

"Pendidikan dan latihan sememangnya penting dalam melahirkan tenaga kerja yang mempunyai pelbagai peringkat kemahiran agar mereka dapat berfungsi dengan produktif.

"Industri juga harus saling bekerjasama dengan institusi pendidikan bagi memastikan program latihan sentiasa dikemas kini dalam usaha memenuhi kemahiran semasa dan masa hadapan," ujarnya.

KOSMORAMA

Oleh MARO

SERANGAN BOM
DI SRI LANKA.



maro